

Date – 18/04/2026

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

1. Aizawl Municipal Corporation inthlan campaign tawp ni vawiin khan political party hrang hrang ten Aizawl khawpui chhungah ngawrh takin mipui vote an zawng.
2. Kham leh Suar' Lalrammawia Ngente ziah chu Mizo Academy of Letters chuan Book of the Year 2025 atan a thlang.
3. Paliament rorel inkhawm chu vawiin khan tiam chin awmlova tihtawp a ni.
4. West Asia buaina a chhuah hnuah India mi 2361 Union Cabinet chuan sawrkar laipui hnuai thawk leh pension te tan Dearness Allowance zaa 2 in a ti pung.



AMC CAMPAIGN

Aizawl Municipal Corporation inthlan campaign tawp ni vawiin khan political party hrang hrang ten Aizawl khawpui chhungah ngawrh takin mipui vote an zawng a,

ZPm Leader Chief Minister Pu Lalduhoma chuan 15th Finance Commission in a thlawna AMC dawn tur kum 2024-25 leh 2025-26 chhunga mi cheng khat mah haichhuah a lo ni lo chu pawl a tih thu a sawi.

Vawiina Aizawla Vanapa Hall kawta Street Campaign kharna hun an hmanah he thu hi sawiin Chief Minister chuan AMC lam hian budget-ah pawh an sum hmuhna hnar lian ber chu an rawn dah lo tih a sawi a. An nawr chhuah zawh loh an hlau nge an sorkar a zo tep tawha ZPM hman mai mai tur an tih vang nge tih chu an nawr loh chhan nia a rin a nih thu a sawi a.

Sorkarin an dinhmun a belhchianin sum hi an dang lo tih a hre chauh tih sawiin a dik loa an lo tih avangin Delhi in an lo phal lo tih a sawi a. Sorkarin siamthat an dil nghal a, hun chep tak karah 2024-25 First Instalment chu Financial Year tawp hma ni 4 ah, thla hmasa ni 27 khan cheng nuai 1,488 an la chhuak thei a. A tukah 2nd Instalment buaipui leh nghal char charin 2nd Instalment cheng nuai 1488 chu an hai chhuak leh a, 2024-25 a dawn tur chu a kim ta tih a sawi a. 2025-26 chhunga dawn tur an haichhuah leh hman ringin theihtawp an chhuah leh a, Financial Year tawp dawn zan minute 20 chauh a la awm tihah 2025-26 first Instalment cheng nuai 1,526 an haichhuak leh hram a, 2nd Instalment chu kumin a liampui ta a ni a ti a. AMC Sorkar thar ding tur chu AMC sorkar awm tawh zawnga hausa ber an ni dawn ta tih a sawi a ni.

Vawiin vek khan ZPM Party Media Chairman Pu B. Lalchhanzova, Minister chuan AMC ah an sorkar chuan mipuite chhawr theih tur siam kawngah nasa taka hma an lak dawn tih a sawi a, vawiin khan Aizawl Press Club-a chanchinbumite kawmin AMC ah theihtawp chhuah an tum tih sawiin AMC dawr har lutuk, sawipuitu tha nei te tan chauha thiltih awlsam anga ngaih thin chu mitin ban phaka hnuh hniam an tum tih a sawi a.

Khawpui chhunga vawk vulh khapna dan ennawn an tum thu sawi bawk.

ZPM chuan AMC chu party sum siam nan hman ve an tum ve dawn loh thu sawiin Aizawl tha zawk, langtlang sorkar din an tum thu a sawi a. Aizawl First tia ZPM AMC chuan ro an rel dawn thu a sawi a, mipuite chu vote theuh tura an ngen thu a sawi a ni.



MNF

MNF General Headquarters Treasurer Pu Lalruatkima chuan Aizawl Municipal Corporation-ah sorkar ngelnghet din turin candidate an neih that ber tum a ni a ti.

Vawiina Aizawl Press Club-a MNF party in chanchinbumite an kawmnaah he thu hi sawiin Pu Lalruatkima chuan a candidate zingah AMC Corporator lo ni tawh te, sorkar, kohhran, kohhran thalai leh sport bakah NGO hrang hranga mi tha tak tak, Zoram thalaite entawn leh ngaihsanrawn te an nih hlawn thu a sawi a. Mipuite chu vote vek turin an sawm a ni.

Pu Lalruatkima chuan AMC inthlanah Mizoram khawpui sawn duh leh duh lo buk an nih dawn tih a sawi a. Sum lamah pawh ZPM sorkarin leiba a ngah hle tih sawiin budget session hnukung bera leiba chu cheng vbc 19,085 nuai 15 a nih thu a sawi a. Sorkar budget pumpui cheng vbc 17,076 leh nuai 92 aini cheng vbc 2008 leh nuai 23 a a tam thu a sawi a. Sorkarin sum an ti lapse nasa a, Lunglei Municipal Council sum chu Financial Year 2024-25 leh 2025-26 belkhawmin cheng nuai 1869 leh sing 9 sang 2 bakah Aizawl Municipal Corporation sum cheng nuai 1526 leh sing 6 an tih lapse thu a sawi a. Sorkar chu financial management-ah an hlawnchham thu a sawi a ni.

Pu Lalruatkima chuan ZPM sorkarah eirukna leh hlemhletna a hluar niin a sawi bawh a chhiah leh bill a pun nasat thu leh mipuih erawh sum a van thu a sawi a. Mipuiin sorkar health care scheme kalpui mek MUHCS an thlawp lo a, tun thla ni 14 thlengin mi 29,472 chauh an la inziaklut tih a sawi ni.

<><><>

CONGRESS PRESS CONFERENCE

MPCC Treasurer Dr. Lalmalsawma Nghaka AMC candidate chuan Aizawl khawpui chu Zofate Jerusalem a nih angin a enkawltu tur mipuiten an thlan turah Congress party chuan mipuite lal ber se an duh thu a sawi.

Vawiina Aizawl Press Club-a AMC inthlan lo awm tur chungchanga chanchinbumite an kawmnaah he thu hi sawiin MPCC Treasurer chuan party dangte aia Congress party danglamna pakhat chu, lainatna nen dan an keng kawh thin a ti a. Tuna AMC Dan hmanlai tam takah hian mipuite tan harsatna a tam hle tih sawiin mipuite chhawk zangkhai tur zawka ngaih AMC chu mipuite tan phurrit a nihna a tam hle tih a sawi a. AMC-ah hian Pathian leh mipuite zara chakna an chan chuan mipuite chhawk zangkhai zawk tur, mipuite phurrit ni lo tur AMC din an tum tih a sawi a ni.

Dr. Lalmalsawma Nghaka chuan Congress party candidate te chu mi naran te te an nih thu a sawi a, AMC Corporator atana mipuiten an thlan tlin phawt chuan mitin ban phak an ni dawn tih a ti a. Aizawl khawpui chu khawpui thang mek a nihnaah enkawi uluk a ngai takzet tih sawiin thutiam hlen thin party an nih avangin Aizawl mipuite beiseina pawh party dangte aia Congress party-ah a sang lehzual tih a sawi a.



BJP

BJP Mizoram State President Dr. K. Beichhua chuan Mizoramah sorkar nei thei dinhmunah an party an ding mek tih sawiin AMC Inthlan chu a bultanna atan an hman a ngaih thu a sawi.

Vawiina Salem Venga street campaign an neihah he thu hi sawiin Dr K. Beichhua chuan politics chu mi tin tan a nih thu a sawi a. Eng hnathawk pawhin an hna kaihnawih a nih loh vang ngawtin politics chu an theihngilh thei bik lo tih sawiin hei hi a chhan chu politics in mitin a nghawng vang a nih thu a sawi a. Sorkar tha hnuaiah chuan eng eizawna nei tan pawh hmasawna a awm a, mitin an hlim thin tih sawiin mipui mamawh pe theitu sorkar neih a ngaih thu a sawi a. Chutiang sorkar nei thei dinhmunah chuan Mizoram a ding mek tih a sawi a ni.

Dr K. Beichhua chuan Aizawl khawpui changkang leh thianghlim, khawpui hrisel, mipui harsatna ata khai chhuak thei tur BJP Candidate te lo vote theuh turin mipuite a sawm tih a sawi a. BJP din chhan ber chu 'Development' - hmasawna hi a ni tih sawiin Aizawl hmasawn nan te, Mizoramin hmasawna tak tak a neih nan te BJP Sorkar a mamawh hle tih a sawi a. India ram hausakna thau chu tun aia Mizorama sâwk chhuak tura rilru siam turin mipuite a sawm tih a sawi bawk a ni.



SEC

State Election Commission (SEC) chuan Model Code of Conduct bawhchhiaa puh Minister pathum, MP pakhat, MLA pakhat leh ZPM, AMC Corporator candidate te puhna finfiahna a awm tawl loh avangin, thiam a chantir.

Model Code of Conduct bawhchhiaa puh mi paruk (6) te hi Agriculture Minister Pu PC Vanlalruata, LAD Minister Pu C. Lalsawivunga, Supply Minister Pu B. Lalchhanzova, Lok Sabha MP Pu Richard Vanlalmangaiha, Adviser to CM Pu Lalmuanpuia Punte leh ZPM Corporator candidate Pu K. Lalrodinga te an ni a. SEC chuan heng MCC Bawhchhiaa puh te hi ziaak a insawifiah turin a ti a, an insawifiah vek a, hei bakah hian complain thehluttu MPCC Legal Cell Secretary Pu H. Lalmuankima leh MNF Legal Board, Joint Secretary Pu Lalbiakkima te chu dan bawhchhiiatna finfiahna an neih ang ang thehltut turin a hriattir bawk a ni.

Minister Pu PC Vanlalruata leh MLA Pu Lalmuanpuia Punte te Official Car hmanga campaign a a puhna chu finfiahna rintlak tawk a awmlah avangin thu tlinga ngai lovin hnawl a ni a. Hetih lai vek hian Republic Vengthlang, Aizawl a transformer dah chungchanga LAD Minister Pu C. Lalsawivunga MCC dan bawhchhiaa puhna chu AMC inthlan puan hmaa thil tih ni a sawifiah a ni a. Minister Pu B. Lalchhanzova, Aizawl East II huam chhung, Chhing Veng junction siam leh Armed Veng ‘S; Cultural Club te puia puhna chu AMC inthlan puan hma ni a sawi a ni bawk a, Lok Sabha MP Pu Richard Vanlalmangaiha, Republic Vengthlang leh Upper Republic Mahindra Bolero Pickup a pe ni a sawi pawh AMC inthlan puan hma ni a sawifiah a ni. AMC Candidate Pu K. Lalrodinga thiltiha puh pawh engmah tih a neih loh thu a sawifiah bawk.

Heng insawifiahna te hi tifiatu tur finfiahna tarlan theih vek a nih lain, complain thehluttuten finfiahna an nei lo a, chuvangin SEC chuan MCC bawhchhiaa-a puhna te hi thu tlingah a ngai lo tih an sawi a ni.



MAL BOOK OF THE YEAR

Kham leh Suar' Lalrammawia Ngente ziah chu Mizo Academy of Letters (MAL) chuan kum 2025 chhunga Mizo tawnga chhuak lehkhabu tha ber, Book of the Year 2025 atan an thlang.

Pu Lalramawia Ngente chuan kham leh suar tih a vuah chhan chu a changtunu in a hringnun kham leh suar a zawh chhuah dan chanchin a ni a ti a, nula pakhat chanchin niin a tawpah Pathian khawngaihna ropui tak changin, A chhandam thei ani tih lantirna lehkhabu a ni a ti. He lehkhabu hi Novel thawnthu a ni.

Book of the Year 2025 lawmman hi April ni 23 William Shakespeare pian ni leh thih ni denchan, Academy of Letter Foundation Day ah Thu leh Hla Inpui, MAL din champha lawmna, I&PR Auditorium-a neih turah Art & Culture Department Director Carol VLMS Dawngkimi'n a hlan ang. Lalrammawia Ngente hian 'Rintei Zunleng' tih a thawnthu ziah hmangin 2019 Book of the Year chawimawina hi a lo dawng tawh bawk a ni.



KOLASIB DIST ROAD CONSTRUCTION

NHIDCL hotute chuan Vairengte leh Sairang inkar kawngpui thawm that hna thawh mek hlawm 5 a then chu hlawm 3 siam zawh tawh a nih thu an sawi.

Vawiina Kolasib Bawrhsap Pu H. Dolianbuaia'n a tlawhnaah he thu hi sawiin NHIDCL hotute chuan hlawm hnih la zawh loh chu black topping an hmabak a. Kawng an siam zawh tawh chin te hi 4-lane laitu EPC Contractor te hnenah hlan a ni tawh tih an sawi bawk a ni.

Bawrhsap hian Kolasib District chhunga 4-lane laih mek pawh hmun hrang hrangah a tlawh nghal a, kawng siam hnaa hmasawwna hmuh tur a awm chu lawmawm a tih thu a sawi a, hnathawktute chu theihtawp chhuaha thawk chhunzawm zel turin a chah a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Chanchinthar hi naktuk zing dar 7 leh a chanve-ah puan leh a ni ang.



PARLIAMENT

Parliament rorel inkhawm chu vawiin khan tiam chin awmlova tihtawp a ni. Heti hian kumin January ni 28-a tan Parliament Budget Session chu zawhfel a ni ta a. Inkhawm a tihtawp hmain Lok Sabha Speaker Om Birla chuan Budget session chhunga House hnathawh chu zaa 93 anih thu a sawi a. Tum 31 thutkhawm a ni tih sawiin session chhung hian sawrkar bill 12 putluh niin bill pakua pass a ni a ti a. Bill pass zingah hian Finance Bill 2026 te, Insolvency and Bankruptcy Code (Amendment) Bill, 2025, Andhra Pradesh Reorganisation (Amendment) Bill, 2026, Jan Vishwas (Amendment of Provisions) Bill, 2026 and Central Armed Police Forces (General Administration) Bill, 2026 te pawh an tel a ti a. Zero Hour chhungin mipui tana thil paiwmawh 326 member ten House ah an sawichhuak a ti bawk.

Rajya Sabha ah chuan Chairman C P Radhakrishnan chuan darkar 157 chhung hna an thawh theih thu a sawi a. An thawhchhuah zat hi zaa 110 lai a ni a ti a. Session neih chhungin Prime Minister Narendra Modia'n West Asia buaina chungchang leh India in energy lama harsatna a hmachhawn mek chungchangah statement a siam a ti bawk.



UNION CABINET

Union Cabinet chuan sawrkar laipui hnuaia thawk leh pension te tan Dearness Allowance zaa 2 in a ti pung. DA thar hi kumin January ni 1 atanga chhiar tan tur a ni a. Union Information and Broadcasting Minister Ashwini Vaishnaw sawidanin DA pung avanga sawrkarin kum khata sum a sen belh tur chu cheng vaibelchhe 6791 anih thu a sawi a. Sawrkar laipui hnuaiah thawk mek mi nuai 50 leh pensioner nuai 68 ten an chhawr dawn a ni a ti.

Union Cabinet chuan Insuarance Pool thar Bharat Maritime Insurance Pool siam a phal bawk a ni.ni.

